

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1981 del 03/07/2026

Manà fora su Trentino Tv l program l vegn endrezà dal Comun General de Fascia

“Pedies”: con en sabeda 4 de messèl vegn fora la puntata #545 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 545. I argomenc de chesta puntata l é: a Trent l Servije Mendranzes Linguistiches à metù a jir na scontrèda co la mendranzes linguistiches del Trentin e la delegazion de la Region Istriana per n confront e n barat de esperienzes e informazions; la Banda de Moena à endrezà, de gra al didament de volontadives, l Prum Dolomites Music Festival; te Fascia, e avisa te la Mont de Poza, l é stat metù a jir scomenzadives per la cura del ambient e per fèr renascer l bosch, anter chestes “Piantar Piantins” e la rubrica “PIATES: chel liber sun scancia” col liber “La Veisc conta” scrit dai bec de la scola populèra de Moena (A.S. 2004/2005)

Te l’Istria vif na popolazion recognosciuda desche mendranza linguistica che à deric particulères per l stravardament de sie lengaz e cultura. Con chela de envièr via n barat de esperienzes e de informazions ence coi raprejentanc de la mendranzes del Trentin e per sottrissèr l leam de na comunanza con sie teritorie, l Servije Mendranzes Linguistiches à envià na **delegazion de l’Istria** a na scontrèda stata enstadi a Trent. Per raprejentèr Fascia à tout pèrt l Istitut Cultural Ladin e l Conseier de Procura con delega a la cultura del CGF Bernardino Chiocchetti.

La **banda de Moena**, en ocasion de la zelebrazions per sie Sènt Patron, Sèn Vile, à endrezà l Prum Dolomites Music Festival, na festa per la comunanza olache no g’è stat fat onor demò a la musega, ma l é stat valorisà ence l sport con na festa per i atlec mondièi fascegn, per l 80m cedean de la sociazion Monti Pallidi e l Sorì event. A ge fèr da cornisc ai evenc, l é stat endrezà “Musega en moviment” olache no podea mencièr musega e coreografia.

Te la mont de Poza, con chela de ge dèr n nef sbunf al bosch che à padì a cajon de Vaia e del becherle, l grop Festa ta Mont, en colaborazion co la frazion de Poza, i forestèi e Elel à endrezà “**Piantar Piantins**”, n dadoman fora de anter olache la jent la é stata envièda a piantèr piantins neves per n bosch più san e ciatarul.

Per la rubrica “**PIATES: chel liber sun scancia**” olache conton de libres e publicazions per cognoscer argomenc curiosc, Maria Piccolin, che la é stata bibliotecaria de Moena, la ne rejon a de “La Veisc conta”, n liber scrit dai bec de la populères de Moena tel an de scola 2004/2005 olache la Veisc ne porta dant conties da zacan e da anchecondi.

I reports de chesta setemèna i é stac enjigné e porté dant da Riccardo Zanoner, Angela Pederiva e Doris Valentini.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” va fora su **Trentino Tv – canal 10 Prov. de TN** - vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program l va fora ence su **AltoAdige TV – canal 11 Prov. de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

La puntata de chesta setemèna la vegnarà fora entorn la medema ora de la televijion.

Se pel veder i report un a un su la piata Facebook de TV Ladina.

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)